

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होरें 51मीं प्रगति बैठक दी अध्यक्षता करदे होई आखेआ कि स्वच्छ भारत मिशन दा दुआ गेड़ छड़ा बुनियादी ढांचे दे निर्माण तगर सीमित नई रौहना लोड़चदा- संगुआ एहदे पर निगरानी ते सब्भन पक्खें कन्नै तालमेल बनाइयै एहदे ठोस नतीजें जकीनी बनाए जाने लोड़चदे।
2. केन्द्री गृहमंत्री अमित शाह होरें आखेआ ऐ कि देसै दे बन्ने थमां 15-15 किलोमीटर अंदर दे इलाके च कुसै बी गैर-कन्नूनी निर्माण गी दना बर्दाश्त नई कीता जाहग।
3. मौसम विभाग नै अगले दंऊ दिनें धोड़ी मध्य ते उत्तर पच्छमी भारत च जबरदस्त लूह चलने दी पेशनगोई कीती दी ऐ।
4. मुख्य दे ज्यादातर इलाके च ईद-अल-अजहा दा ध्यार अज्ज पारम्परिक धार्मिक श्रद्धा ते उत्साह कन्नै मनाया जा' रदा ऐ। राष्ट्रपति- प्रधानमंत्री ते होर केंई लीडरें लोकें गी ममारकबाद दिती ऐ।
5. आई.पी.एल. दे इलीमिनेटर मकाबले च कल राजस्थान रॉयल्स नै सनराइजर्स हैदराबाद गी 47 रन्ज कन्नै रहाया। दुआ क्वालीफायर कल राजस्थान ते गुजरात दिए टीमें बश्कार खेड़येया जाहग।

<><><><><><>

PM -Pragati

प्रधानमंत्री नरेन्द्र मोदी होरें “स्वच्छ भारत” मिशन दे दुए गेड़ गी असरदार ढंगै सिर लागू करने दी जरूरतें पर जोर दिंदे होई आखेआ ऐ कि एह अभियान ना छड़ा बुनियादी ढांचे दे निर्माण तगर सीमित रौहना लोड़चदा संगुआ एहदे पर बकायद'गी कन्नै निगरानी- लोकें दा कन्नै जुड़ना ते सहयोग ते बक्ख-बक्ख पक्खें कन्नै तालमेल बनाइयै एहदे निगगर-ठोस नतीजे जकीनी बनाए जाने लोड़चदे। नमीं दिल्ली च 51मीं प्रगति बैठक गी सम्बोधित करदे होई प्रधानमंत्री होरें राज्यें गी कूड़े-कचरे दे सेही चाल्ली प्रबंधन कन्नै जुड़ी दिए परियोजनें जियां वेस्ट प्रॉसेसिंग- गोबर-धन संयंत्रें दा निर्माण वगैरा दे कम्मै च तेजी आहन्नने दी जरूरतें पर जोर दिता। बैठका च प्रधानमंत्री होरें 9 राज्यें च रेलवे- बिजली ते सिड़क क्षेत्रें च लगभग 30 ज्हार करोड़ रपे दी लागत आहलियें बुनियादी सेवाएं- सुविधाएं दिए 7 महत्वपूर्ण परियोजनाएं दी समीक्षा कीती। मोदी होरें शैहरी इलाकें- रिहायशी परिसर ते सार्वजनिक संस्थानें च छते पर सोलर पैनल लाने गी बढ़ावा देने पर जोर दिता। उ'नें आक्खेया कि एहदे नै बिजली दी लागत घट्ट होग- ऊर्जा दी बचत होग- ऊर्जा सुरक्षा बधोग ते स्वच्छ ऊर्जा गी प्रोत्साहन थहोग। प्रधानमंत्री होरें आखेआ कि सार्वजनिक परियोजनाएं गी लागू करने च चिरे लग्गने कारण उन्दी लागत ते बधदी ऐ पर आम लोकें गी समें-सिर इन्दा लाह बी हासल नई होंदा। उ'नें आखेआ कि मंत्रालयें- मैहकमें ते राज्यें गी बकाया मुद्दें गी हल करने-अड़ने रुकावटें गी दूर करने ते तेजिया कन्नै इंदी अमलावरी जकीनी बनाने लेई बी आखेआ।

<><><><><><>

Amit Shah -Border

गृहमंत्री अमित शाह होरें आखेआ ऐ जे देसै दे बन्ने थमां 15 किलोमीटर दे अंदर कुसै बी गैर-कनूनी निर्माण गी दना बर्दाश्त नैई कीता जाहग। उ'नें ऐसे सब्भनें गैर-कनूनी ढांचे गी तुरत तबाह करने दे निर्देश दिते न। राजस्थान दे बीकानेर च सुरक्षा समीक्षा बैठक दे दरान अमित शाह होरें भारत-पाकिस्तान बन्ने कन्नै जुड़े दे जिलें दी सुरक्षा बवस्था दी समीक्षा कीती। गृह मंत्रालय ने जिला अधिकारियें गी एह गल्ल जकीनी बनाने लेई आखेआ ऐ जे बन्ने आले इलाकें च होने आले बैंकिंग लैन-देन पूरी चाल्ली कनूनी नियमें मुजब होन। बड़े बपारिक संस्थानें दी जांच ते उन्दी औंदन दे जरिये दी बी पड़ताल करने दे निर्देश दिते गे न। एहदे इलावा प्रशासन गी फर्जी बैंक खातें ते कम्पनियें सनें फर्जी आधार कार्ड दी पंछान करने दे निर्देश बी जारी कीते गे न। श्री शाह होरें बन्ने आहले जिलें लेई मजबूत सुरक्षा बवस्था पर जोर दिता ऐ- जेहदे च आम नागरिक राज्य सरकार ते सुरक्षा एजेंसियें कन्नै रलियें कम्म करन।

<><><><><><>

HM –Savarkar

केन्द्री गृहमंत्री अमित शाह होरें अज्ज वीर सावरकर हुंदी जयंति दे मौके पर उनें'गी श्रद्धांजलि भेंट कीती ऐ। अपनी इक सोशल मीडिया पोस्ट पर अमित शाह होरें लिखेया कि अजादी दी लड़ाई दे दलेर ते बेखौफ योद्धा वीर सावरकर होरें अपना पूरा जीवन मातृभूमि दी सेवा दे नमित करी दिता। उ'नें आखेआ कि उन्दे जीवन ते लेखन सवां अस राष्ट्र ते विचार धारा दे प्रति अनट्रुट निश्ठा दा सेही मतलब समझी सकने हां। अमित शाह होरें आखेआ कि वीर सावरकर हुंदा एह आक्खना ऐ कि “हे मातृभूमि- तेरे बिजन जीना मौत आहला लेखआ ऐ”- राष्ट्र दे प्रति उन्दे बेइन्तहा प्यार गी दर्शादा ऐ।

<><><><><><>

Pak –Violence

पाकिस्तान च बलूचिस्तान दे हरनाई जिले दे शाहराग इलाके च बेपंछानू बंदूकधारिण मकामी लोकें दे इक समूह पर अन्नेबाह गोलीबारी कीती- जेहदे च 5एं जनें दी मौत ते 3 घासल होई गेन। हमलावरें शेख मूसा बाबा चैके कश इक नाका लाए दा हा- जित्थे ओ औने -जाने आहलें लोकें दी पंछान लेई उन्दे शनाख्ती कार्ड चैक कर'रदे हे। पुलसै दस्सेआ कि किश मकामी लोकें इस चाली आम लोकें दी तलाशी लैने दा जिसले विरोध कीता तां एहदे पर उन्दी आपू च तू-तू मै-मै होई ते मगरा बेपंछानू बंदूकधारियें भीड़ पर गोलीबारी शुरू करी दिती। 4 जनें दी मौके पर गै मौत होई गई- जिसले कि घायल 4 जनें चा इक नै अस्पताल पुज्जने कोला पैहले रस्ते च गै दम त्रोड़ी दिता। एहदे शा पैहले संगारें कराची नमें बोहे दे लाड़ी- मराज दी गोली मारियै हत्या करी दिती गई ही- जिसलै ओ मकामी अदालत च अपने ब्याह दा पंजीकरण कराइयै बाहर आवा'रदे हे।

<><><><><><>

Weather

मौसम विभाग नै अगले दंऊ दिनें दौरान मध्य ते उत्तर पच्छमी भारत च जबरदस्त लू चलने दे असार दस्से न। पूर्वी मध्य प्रदेश ते विदर्भ च अज्ज लू लेई रेड अलर्ट जारी कीता गेदा ऐ- जिसले कि दिल्ली- चंडीगढ़- राजस्थान- छत्तीसगढ़- हरियाणा- हिमाचल प्रदेश- कोकण- गोवा- ओडिशा- पंजाब-तेलंगाना ते उत्तर प्रदेश च बी अज्ज लू चलने दी पेशनगोई कीती गेदी ऐ। लोकें गी गर्मी ते लू कोला बचाs लेई जरूरी बंदोबस्त करने लेई आखेआ गेदा ऐ ते इस गल्लै दी ताकीद कीती गेदी ऐ कि बड़ा मता जरूरी कम्म नैई होने पर घरा बाहर नैई निकलन।

<><><><><><>

CBSE Allegation

केन्द्री माध्यमिक शिक्षा बोर्ड CBSE नै हैदराबाद दी इक कम्पनी Coempt Edutek गी मतेयाने दे पेपर चैक्क करने लेई ठेका दिते जाने कन्नै जुड़े दे आरोपें गी खारज करी दिता ऐ। इक सोशल मीडिया पोस्ट च बोर्ड नै इनें आरोपें गी झूठा- बेबुनियाद ते लोकें च भर्म पैदा करने आहला दस्सेआ ते आखेआ कि कम्पनी गी ठेका देने च माली ते होर सब्भनें नियमें दी पूरी संजीदगी कन्नै पालमा कीती गेई ऐ। बोर्ड नै साफ कीता कि बोर्ड मतेयान 2026 दी आंसर शीटें दी डिजीटल चैकिंग लेई सरकारी नियमें मुजब गै टेंडर मंगें गे हे।

<><><><><><>

UPSC

संघ लोक सेवा आयोग नै पैहली बारी सिविल सेवा प्रारंभिक परीक्षा 2026 दी Answer Key जारी करी दिती ऐ। अपने इक ब्याने च आयोग नै आखेआ ऐ जे इम्तेहान च शामिल होए दे मेदवार 31 मेई संजा 6 बजे तगर upsonline.nic.in पर उपलब्ध ऑनलाईन प्रश्न पत्र आपत्ति पोर्टल राएं अपनियां आपत्तियां देई सकदे न।

<><><><><><>

Eid-UI-Azha

ईद-उल-अजहा अज्ज देशे दे बक्ख-बक्ख हिस्सें च पूरे धार्मिक जोश ते खुशी दे कन्नै मनाई जा'रदी ऐ। इसी बकरीद बी आखेआ जंदा ऐ। बड़लै थमां गै मसीतें ते ईदगाहें च बशेश नमाज़ लेई श्रद्धालू पुज्जा करदे न। राश्ट्री राजधानी दिल्ली च जामा मस्जिद- फतेहपुरी मस्जिद ते शाही ईदगाह च ईद दी मुख्ख नमाज़ अदा कीती जा'रदी ऐ। इस मौके पर सुरक्षा दे निगगर बंदोबस्त कीते गेदे न तां जे ध्यार शांतिपूर्ण ढंगे नै सम्पन्न होए ते कन्नू बवस्था बी बनी दी रवै। तोंआई जम्मू-कश्मीर च ईद दा ध्यार कल मनाया गेआ। ऊआं प्रदेश च अज्ज बी ईद दे ध्यार दा जश्न मनाया जा करदा ऐ।

<><><><><><>

Prez –Eid

राष्ट्रपति द्रौपदी मुर्मू ते प्रधानमंत्री नरेन्द्र मोदी होरें ईद-उल-अज़हा दे मौके पर देशवासियें गी बधाई दिती ऐ। अपने संदेश च राष्ट्रपति होरें आखेआ जे एह ध्यार भक्ति- त्याग ते निस्वार्थ भावना दा प्रतीक ऐ। उ'नें आखेआ जे एह ध्यार नागरिकें गी मनुक्ख -जाति ते खासकरियें वंचित लोकें दी सेवा करने लेई प्रेरित करदा ऐ। उ'नें नागरिकें गी समाज च हिरख-प्रेम ते सदभाव गी बढ़ावा देने दे संकल्प गी मज़बूत करने दी गुज़राश कीती। प्रधानमंत्री मोदी होरें अपने सनेह च देशवासियें गी ममारकबाद दिंदे होई मेद प्रगट कीती जे ईद दा एह ध्यार समाज च सदभाव ते भाईचारे दिएं कदरें गी होर मता गैहरा ते मजबूत करोग।

<><><><><><>

IPL

IPL क्रिकेट दे Eliminator मुकाबले च कल रातीं राजस्थान रॉयल्स ने सनराजर्स हैदराबाद गी 47 रन्जें कन्नै हराई दिता। न्यू चंडीगढ़ च पैहले बल्लेबाजी करदे होई राजस्थान ने तय 20एं ओवरें च 8 विकेटें पर 243 रन्ज बनाए जेहदे परते च हैदराबाद दी टीम अखीरले ओवर च 196 रन्जें पर गै सिमटी गई। राजस्थान लेई वैभव सूर्यवंशी ने 29एं गेंदे च शानदार 97 रन्जें दी पारी खेड़्ठी ते उस'गी प्लेयर ऑफ द मैच चुनेया गेआ। प्रतियोगिता च कल दुए Qualifier मुकाबले च राजस्थान रॉयल्स ते गुजरात टाइटन्स आमने-सामने होगन। जेतू टीम दा मुकाबला तारे अहमदाबाद दे नरेन्द्र मोदी स्टेडियम च रॉयल चैलेन्जर्स बेंगलुरु कन्नै होग।

<><><><><><>